

四庫全書

集部

欽定四庫全書

石倉歷代詩選卷一百五十五

明 曹學佺 編

宋詩三十二

文同

秦王卷衣

咸陽秦王家宮闕明曉霞丹文映碧鏤光采相鈎加銅  
螭逐銀貌壓屋矜蟠拏洞戶鎖日月其中光景賒春風

動珠箔鸞額金窠斜美人却扇坐看落庭下花閒弄玉  
指環輕冰扼紅牙君王顧之笑為駐七寶車自卷金鏤  
衣龍鸞蔚紛葩持以贈所愛結歡期無涯

塘上行

寒塘漲新雨灩灩翠波滿沙晴步聲澀風引羅帶緩蒲  
芽妬舌利荷葉歡心卷生平玉衣夢至此神亦誕徒誦  
小星篇無人覺腸斷

釣竿

霜刀裁綠筠，桂餌掛輕緡。歛迹天地間，側身江海濱。悠  
悠寶帳夜，寂寂烟波春。何時投竿歸，再與君子親。

採蓮曲

綠纈襠，紅繡裳。衫盤蜂蝶裙，鴛鴦雕瑰錯。寶垂鬢，長紫  
冒翠葢。行新粧，踰蹊曲。堤下回塘盡，橈送入波中央。羅  
袖卷起金釧光，搖輕撼脆敲短芒。丹瓊紺玉低，復昂霄  
裊薄粉撲嫩黃。蠶腰蛛絲輕飄揚，列坐綵舫求北方。笑  
聲吃吃動明璫，挨蒲拂蓼次岸旁。風吹落霞供晚涼，西

城鴟鴞啼女牆歸來索酒酌滿觴  
吳屏蜀帳圍象牀困卧不起燈燭張  
瑠璃盎缶叢生香

芳樹

庭前有芳樹穠陰滿軒碧莫惜更攜酒  
醉此青春色朝來見鷓鴣飛鳴繞其側  
光景不可留徒遣君歎息

夜起來

曉窻明綠紗蜀錦壓春卧橫腮虎魄冷  
驚起新夢破玲瓏轉條脫縹緲梳矮墮  
高軸響銀牀時誤君車過

貴侯行

將軍功勲滿旗常昨日賜對開明光腰懸橐駝紫金鈕  
爵號進拜諸侯王戟衣翩翩弄春影大第高門臨萬井  
但願刺閨無羽檄常官中都奉朝請

朱櫻桃

金衣珍禽弄深樾禁蘂朱櫻斑若纈上幸離宮促薦新  
藤藍寶籠貂璫發凝霞作丸珠尚軟油露成津蜜初割  
君王日午坐猗蘭翡翠一盤紅韎鞬

拾羽曲

新羅研紅裙襍齊綵縷刺衫花倒提新晴暖日麗烟草  
金獸齧鎖藏春閨朱橋逼江曉沙白錦帶交風大堤窄  
蘭洲遺翎得殘碧歸來驚飛上嬌額

題東宮隱者壁

青峯叢叢擁危壑綠樹團團扶曲閣幽人睡起漱寒泉  
坐看一林山雨落宮前火氣雜芝朮澗下苔痕亂猿鶴  
自憐塵土滿衣衫欲解從君今尚莫

東山亭

朝陽之峯乃天設曲嶺長岡地盤結下臨絕澗走縈回  
上聳危亭飛截窠晚雲幾處水墨畫秋樹數番紅綠纈  
安能恰會此時閒靜與詩翁吟曉雪

水邊春半

芹芽差差蘭笋短石渠水銷水色淺倡情冶思不可奈  
好鳥間闌花婉婉鮮衫翠裙者誰氏行歌楊枝惜時晚  
臨流有客抱危膝苦調長謠問誰遣



採藥歸晚因宿野人山舍

東巖陰深崖巖古夾澗垂泉結鷺乳  
我來採藥晚忘歸  
試宿荆扇問雞黍春風滿林燈火冷  
一夜不眠山月苦  
平明攜策下青蒼松葉紛紛灑新雨

後溪晚步

陰陰芳樹暗回堤路入蒙籠轉野溪  
澤雉應媒高復下  
林鷄引子歇還啼青蒲宛宛全淹水  
紫笋班班半出泥  
倚杖風前感時節亂烟斜日一蟬嘶

山中新晴

山中新晴曉烟暖散帶頽冠漱巖畔海鹽未去猿鶴喜  
柴桑初歸松菊亂林間餘雨時一滴嶺上飛雲忽雙斷  
安能舉手恣扶搖欲共高鴻拂霄漢

曉入東谷

振纓効王官釋耒去鄉縣十年始還此景物覺盡變東  
谷素所愛乍到若創見烟雲引晨策數里入葱蒨明霞  
照溪口花草露初泣長松盤高岡疎疎擢秀幹垂陰雜

羣木上欲接霄漢柔羅互釣鎖攬地走荒蔓修篁揭其  
間萬個挺若箭登臨愴舊厯眺聽悅新玩讀書破茅廬  
徑約已漂斷惟餘舍南水尚吐石竇濺潺潺落危壑袞  
袞引飛練臨流濯塵襟照影相覲面功名竟何所旅跡  
轉孤賤引手謝猿鶴深慙爾驚怨

夏間

夏樹始繁密條縷方且柔左右覆吾廬合如張碧油新  
蟬噪晴午餘響藏深幽軒窻轉炎日清影為我留何當

薰風來一與掃蕩收吾將就高蔭濯足臨寒流

田舍

園林曉氣清籬巷夕陽明石竇聞寒碓烟波見晚耕豚蹄供禱賽龜殼問陰晴欲識豐年樂村村雞犬聲

春閨

枕帶縈春意窻紗漏曉光蠅蛸傷遠別鷓鴣感流芳粧匣蒸殘粉薰爐試舊香洞房燈燭外只有夢悠揚

採桑

谿橋接桑畦鉤籠呼羣過今朝去何早向晚蚕恐卧家  
家五十日誰敢一日惰未言給私用且以應官課

張少愚書院

澗水侵斷橋車馬不得通飛嵐積庭礎秋蘚垂紫茸窗  
紙爛溪雨簾衣圻林風主人殊未歸使我烟景空

早晴至報恩山寺

山石巉巖磴道微拂松穿竹露沾衣烟開遠水雙鷗落  
日照高林一雉飛大麥未收治圃晚小蚕猶卧斫桑稀

暮烟已合牛羊下信馬林間步月歸

永泰劉令清曦亭

木杪照初日捲簾知曉晴軒窗無限思圖史有餘清露  
下濛花重風來泛竹輕何須嫌五斗持此謝淵明

貧居

繩牀擁敝裯初起髮未擲南窗展書卷就暖讀寒日門  
前絕車馬薄暮垂片席短牆挂纖蔓幽鳥啄紅實羣蝸  
惡積雨繚繞篆空壁男兒處貧賤舉首宇宙窄翩翩槍

榆鳩宛轉匿絮蟲妻孥競相笑憔悴守文筆

惜花

胡蜂採花花氣薄黃鳥啄花花藥落林風吹花花片亂  
池水浸花花色惡少年惜花會花意晴張青幃雨油幕  
勸君直須為花飲明日春歸空晚萼

織婦怨

擲梭兩手倦踏籜雙足妍三日不住織一匹纔可剪織  
處畏風日剪時謹刀尺皆言邊幅好自愛經緯密昨朝

持入庫何事監官怒大字雕印文濃和油墨汙父母抱  
歸舍拋向中門下相看各無語淚迸若傾瀉質錢解衣  
服買絲添上軸不敢輒下機連宵停火燭當須了租賦  
豈暇恤襦袴前知寒切骨甘心肩胛露里胥踞門限叫  
罵嗔納晚安得織婦心變作監官眼

均逸亭

亭午跨城端新苔磴道盤風光晴水石烟景暮林巒薄  
領仍多暇賓從每盡歡何由掉塵鞅聊問借闌干



青山道

冥冥青山道叢木含古烟遠客事行役未晚不敢前乳  
虎正養子采食大路邊但顧己所急其誰辨愚賢

秋興

晨風吹茂林夕露下芳畹秋容變憔悴復此白日短蕭  
蕭歲華暮冉冉節物換浩歎倚前楹使我心曲亂

其二

百蟲感秋陰入夜聲更切問爾苦何事到曉啼不歇盈

庭不可止翦巖藏萬穴會是天運然相將送凋節

書隱者壁

枳棘分三徑猿猱結四鄰茂林修竹地枕石漱流人看  
雨撐藤杖迎風卸葛巾我來懷愧甚衣上有紅塵

蒼溪山寺

正午風色高遂泊蒼溪縣層崖抱林木有寺藏葱蒨出  
船步危磴蔭密頗縈轉上到金仙家綠空列臺殿修篁  
掛懸溜坐覺炎暑變老僧曉經論言語何貫穿引我上

高閣闌干俯江面寥寥百里內山水盡奇觀誰謂羈旅  
中所見皆所願汀洲白鳥聚井邑青烟散樂此暮忘歸  
踈鐘起巖畔徙倚下松門尚怪舟人喚

夏日閒書墨君堂壁

先人有弊廬涪水之東邊我罷漢中守歸此聊息焉高  
林抱深麓清蔭密右綿曾巖敞戶外淺瀨流窻前邀客  
上素琴留僧酌寒泉忽時乘高風遠望立雲烟野興極  
浩蕩俗慮無一緣氣爽神自樂世故便可捐却憶為吏

時荷重常滿肩几案堆簿書區處忘食眠冠帶坐大暑  
額汗常涓涓每懼落深責取適敢自便安閒獲在茲悅  
若夢遊仙

其二

歸來山中住便作山中人冠帶亦自閒累月不著身散  
髮層巖阿濯足清澗濱石蘚粘簡冊松風墮衣巾鄉里  
多舊遊不厭過從頻山肴與野釀待我如佳賓有召即  
走赴樂其愛我真常恐禮數乖取問吾交親正此一夏

樂忽茲遘蕭辰還愧擁千騎又走西道塵

呈里中諸友

君莫嗔我不讀書君莫笑我不飲酒更精文史豈足用  
漸老歡娛復何有負郭安得二頃田舉家已聚三十口  
山中更無百日閒浙浙西風驅馬首

書綠帷亭壁

喬木繞舍如綠帷羣山四面寒參差春禽入秋啼自別  
早雲到暮歸常遲庭前好菊勸飲酒案上佳紙邀吟詩

閒居數月興便野渾忘簿書相聒時

墨君堂

嗜竹種復盡渾如玉掾居高堂倚空巖素壁交扶踈山影覆秋靜月色澄夜虛蕭爽只自適誰能愛吾廬

登邠州城樓

試此望搖落秋襟成惘然客懷傷薄暮節物感窮邊斷燒侵高壘微陽入晚川年來舊山意常與雁翩翩

登山城書事

節物感羈旅連空生塞陰  
亂鴻寒渚遠羣雀晚叢深  
霜重涇灘出烟高隴樹沉  
歲華徒自老幽憤滿登臨

送夏殿直

霜樹東門曉清寒滿客衣  
一樽從此別百兩幾時歸  
漆水魚初薦梁園雪正飛  
高堂今適郡須念報春暉

和張屯田秋晚靈峯東閣閒望

直欄橫絕紫微陰凭裏秋光  
照客襟一道山川寒色遠  
萬家烟火夕陽深  
涇灘水落羣鷗集秦嶺雲高斷雁沉

此興浩然須把酒可憐難醉異鄉心

宜祿昭仁寺後軒

危欄憑絕壑欲奈此時何但有夕陽處就中秋色多與  
誰同徙倚空自發吟哦便覺成羈旅歸心逐雁過

玉峯園經春不得一過因成詩呈同官約遊

春來少嬉遊俗事日相耗南園只城外累月不一到花  
香雨後歇樹色風中老惟有巖下泉猶能滌幽抱

亭口



林下翩翩雁影斜滿村紅葉映人家巖頭孤寺見橫閣  
有客獨來登暮霞

淺水原

鷄孤西北地鱗鱗此處當年起戰塵見說如今溝壑下  
斷鋒殘鏃屬耕民

運判南園瞻民閣

青都高與紫霄通獨此危欄望不窮萬嶺迫雲秋色裏  
一峯擎雪夕陽中欄楹曉落天倉月窻戶晴吹石闕風

民吏安閒財賦足管絃時復在層空

和張推官元夕

山郡上元榮樂事大開金地作遨場烟雲向曉誰教霽  
燈燭乘春自有香紫陌熒煌隨步遠綵棚佳麗鬪眉長  
遊人莫惜酬高直買取銀蟾一寸光

雨過側調

陰車飛空載急雨雨過林塘若新換榴花浮波魚誤食  
松子落屋烏驚彈白雲挂樹久不起青烟泊草殊未散

東園傲吏愛高竹把卷倚風頭髮亂

貽靜林詩僧已老

七十吟中老清風滿舊林倚筇秋岸遠圍衲夜房深未  
得雲空在將成月已沉生平苦如此誰是識師心

閒居院上方晚景

繞巖縈谷到禪扃更上危巔最上亭風攪亂鷄盤古木  
雨催羣鷺下寒汀秋田溝隴如碁局晚岫峯巒若畫屏  
詩已吟成終夕去遠村燈火一星星

彭山縣居

公館靜寥寥園亭景物饒  
溪光明短杓樹影蔭危樵  
山鳥忽雙下池魚時一跳  
主人王事簡文酒日逍遙

送郭方叔南充簿

六月東山道炎風滿去鞍  
譙周之舊里仇覽之初官  
簿領無煩壅圖書好燕安  
清朝名路濶慎勿學長歎

題鶴鳴化上清宮

祕宇壓孱顏飛梯上屈盤  
清流抱山合喬樹夾雲寒  
地

古芝英圻巖秋石乳乾飈輪遊底處空自立層壇

寄楞嚴大師

錦官城裏寺一室若雲峯水縮秋吟鼎霜低夜講松住  
齋塵入鉢出定蘚生節曾聽三摩義居常夢曉鐘

北郭

繞樹垂蘿蔭曲堤暖烟深處亂禽啼何人來此共攜酒  
可惜拒霜花一谿

鴛

濃染羽毛深畫眉  
曉來風日正晴時  
只應自道新聲好  
啼徧後園花萬枝

房公湖

一頃清波四面平  
宛然唐相舊經營  
高秋林木形容老  
落日樓臺綵繪明  
有景可尋蘭擢遠  
無幽不入竹橋橫  
二年所得官居樂  
不厭頻來緩帶行

什邡道中

驅馬下遙川  
殘陽促晚鞭  
高林夾廣道  
亂水入平田  
村

落晴如畫桑林晝起烟飛鴻正南下歸意滿雲邊

步月

掩卷下中庭月色浩如水秋氣涼滿襟松陰密鋪地百  
蟲催夜去一鴈領寒起靜念忘世紛誰同此佳味

郡學鏤宿

長栢高栢蔭廣庭夜涼人靜夢魂清不知山月幾時落  
每到曉鐘聞雨聲

鬪碧亭

雨餘山景鮮風定水光好晴陽破宿霧秀色濃可掃平  
時一樽酒野客共傾倒朝暮山水間年華不知老

夜聲

秋風動衰草撼撼響夜月其下有鳴蛩到曉啼不歇乃  
知搖落時衆籟自感發安得苦吟人不能為一呖

新晴山月

高松漏疎月落影如畫地徘徊愛其下夜久不能寐怯  
風池荷卷病雨山果墜誰伴舍苦吟滿林啼絡緯



近日

近日簿書全簡少吏人惟趨兩衙休歸來便只尋冠屨  
遶偏林亭山上頭

山城秋日野望感事書懷呈吳龍圖

已是秋陰更夕曛亂山高下起寒雲危樓願見客何處  
遠笛不知人厭聞身外流年波渺渺眼前生事葉紛紛  
此愁萬斛誰量得直為重捻庾信文

憶西湖舊遊

西湖晴碧晚溶溶與客常來坐好風記得有人歌小玉  
月明猶在畫船中

山園

久雨無所適新晴步山園西風滿高林敗葉驚已翻時  
節急如此世事安可論夜歸燈下吟寒蟲伴幽喧

觀音院怪松

怪松屢見無如此每度來觀說向僧若遇風雷宜守護  
恐生頭角便飛騰秋聲遶殿隨齋磬夜影侵廊對佛燈

韋偃畢宏今不在欲求人盡有誰能

寄紀禪師

自笑塵中遊宦客長輸林下坐禪僧  
水田百畝一區宅歸老城南何日能

吾友務深有歎渠之什運使子駿答之佳章務  
深亦使余繼作

白水滿方湖山中好秋色逋翁促瑤軫來坐湖水側臨  
風起高調此興浩無極波靜戢遊鱗雲空矯飛翼蕭條

變林野萬籟一以息且莫緩商絃令人涕橫臆

山齋

職事凡少休餘復不經眼幽齋設橫榻盡日對層巘遙  
懷寄浩蕩靜想榮巖巖松雨潤書匳竹風吹酒盞榮名  
付傲兀勝事入清簡雖有舊林泉何須嗟去晚

北齋雨後

小庭幽圃絕清佳愛此常教放吏衙雨後雙禽來占竹  
秋深一蝶下尋花喚人掃壁開吳畫留客臨軒試越茶

野興漸多公事少宛如當日在山家

屬疾梧軒

高梧覆新葉滿院發華滋白日一何永清陰閒自移暖  
蟲垂到地晴鳥語多時病肘倚枯榻泊然忘所思

北園

春風有多少盡入使君家當與郡人樂滿園桃李花

提葫蘆

花開已堪摘酒熟正好沽山禽會人意勸我提葫蘆

過朝天嶺

雙壁相參萬木深  
馬前猿鳥亦難尋  
雲容杳杳斷鴻意  
風色蕭蕭行客心  
山若畫屏隨峽勢  
水如衣帶轉巖陰  
生平來往成何事  
且倚鉤欄擁鼻吟

過青泥

鐵山正月雪交加  
欲探東風未有涯  
纔過青泥春便好  
水邊林下見梅花

天漢橋

風吹兩岸菰蒲乾日灑一汀鳬鶩寒夜深霜月照湖水  
須上此橋憑盡欄

折楊枝

垂楊百尺臨池水風定烟濃盤不起欲折長條寄遠行  
想到君邊已憔悴

石倉歷代詩選卷一百五十五

欽定四庫全書

石倉歷代詩選卷一百五十六

明 曹學佺 編

宋詩三十三

唐庚

白頭吟

秋風團扇情  
夜雨長門意  
高鳥既已逝  
潛魚自當棄  
賤妾白頭吟  
知君懷異心  
祇知茂陵女  
不憶臨邛琴



五雜俎

五雜俎水中魚去復還天上鳬不獲已轅下駒  
五雜俎名利地去復還塵埃轡不獲已貧而仕

客至

山頭竹萬箇風來玉相戛下有屋數間蕭然如佛刹門  
無車馬喧徑幽芳草茁隔窻識君聲遽起投筆札黃雞  
未啄黍環堵無可殺園蔬煮淡泊山泉啜甘滑何以樂  
嘉賓春禽日嘲咢

圓蛤

黃犢鳴水中相顧皆愕然探之無所得有蛙僅如錢持  
問旁舍翁云此號圓蛤夏潦漲溝渠喧呼自酬答卒然  
聞其聲謂當可專車既見一拊掌寸筵量有餘物生元  
氣中小大各異趣蛙質黃牛鳴持此欲誰附我居固已  
陋爾鳴良太繁綿蠻嚙黃鸝我今思故園

北歸至廣州寄惠州故人

歸心如躍馬奮迅不可駐別情如放猿已去猶返顧三

年孺子杜數借柱史書好在五噫者善保千金軀舊來  
談天口老去盡地力萬里不相忘寄聲問眠食

結客少年場

結客何用少年場男兒尚氣須激昂朝從魯朱家暮過  
秦武陽飲酒邯鄲市膝上橫秋霜明年從軍入燉煌金  
印紫綬輝路傍貧中知己慎勿忘

食笋行

半夜春山試雷雨驚起蟄龍初出土野人不惜蒼苔深

掘得嘉根自燒煮滿盤明玉遠飄香一筋鱸魚味差苦  
竹齋食罷竹陰午竹裏行吟傲簪組君誇食肉君固卑  
我誇食笋我亦癡阿蠻豐肌飛燕瘦意態雖異要皆奇  
君不見天隨先生貧食杞關中客卿肥刺齒豐儉不齊  
理或然彼此相忘聊爾耳

喜雨呈趙世澤

去年雨多憂水潦今年雨少憂枯槁都緣縣政失中和  
水旱年年勤父老前時雲起雨欲落夜半風來還一掃

明朝引首望雲漢屋上晨暎仍杲杲賦輸百萬未破白  
簿脚何緣得勾倒上書自劾欲歸去老婦挽衣傍奪橐  
技窮往訴北山神是多需然償所禱稻畦罷亞勢已活  
竹裏蕭疎聲更好故應神意閔孤拙苟免歲中書下考  
便安杵臼伺秋成雲子滿田行可擣

內前行

內前車馬撥不開文德殿前宣麻回紫薇侍郎拜右相  
中使押赴文昌臺旋頭昨夜光照牖是夕收芒如禿帚

明日化為甘雨來宅家喚作調元手周公禮樂未要作  
致身姚宋也不惡向來兩翁當國年民間斗米纔四錢

大熟行

去年大雪埋尺箠水北荔枝遭凍死共嗔北客帶寒來  
我欲分疏誰受理今年諸峒十分熟東江不下龍川米  
南翁北客兩欣然孰與忍饑食荔子

蚤兒歌

瀘南二子天一邊思之不見今三年阮咸已老得遙集

白髮自愧還欣然未看顱骨并頰顙啼中已有過秦篇  
諸田何得賤庶孽會斬莊賈摧強燕

採藥行贈梅蟠

順途行歌醉者誰先生採藥山中歸昨日攜籃入山去  
今日出山香滿路先生年來飯黃精俗眼但白髮但青  
得失乘除適相補勿取讒人畀豺虎

循州雜詠

屏跡舍人巷灌園居士橋花開不旋踵草薶復齊腰蛤

笑明朝雨雞鳴閣夜潮未能全獨樂鄰里去招邀

已絕經年筆仍闕盡日門身謀嗟翠羽人事歎榕根蔬  
食風掀市樓居水破村嶺南霜甚薄何得鬢邊繁

飽食為茶地深耕覓酒杯翻泥逢暗笋汲井得飛梅湖  
盡船頭轉山窮屐齒回田間良自苦清興亦悠哉

壯歲日千里晚途天一方花縵聊傲世白袷亦隨鄉團  
扇侵時令方書遣晝長此間吾所樂便擬上林塘

為農沙子步附保水西鄉隱几江天遠開門佛土香時



情荒徑草埜色淡漁梁欲縱高秋日東偏作短牆

舊物杯中酒新詩海上翁百非無一是顯過豈微功引  
水江分碧烹丹井為紅幽居亦多事度日不全空

覆載宜然等寒暄乃爾殊雪曾前歲有地過此邦無煮  
海鯨鯢動烹山虎豹呼南來何所得詩語帶嫵隅

九日懷舍弟

重陽陶令節單閼賈生年秋色蒼梧外衰顏紫菊前登  
高知地盡引滿覺天旋去歲京城雨茱萸對惠連

人日

人日傷心極  
天時觸目新  
殘梅詩興晚  
細草夢魂春  
挑菜年年俗  
飛蓬處處身  
暮頤頻語及  
髣髴到東津

九日獨酌

登高無老伴  
引滿自高歌  
歡意天邊少  
重陽野外多  
黃花空歲月  
白首尚關河  
他日龍山興  
吾今在網羅

十月復暄

誰會世間事  
即今冬後秋  
殘年仍御袂  
先日已重裘  
地

勢炎烟令天時北客愁此生橐籥內反復任吹咻

送客之五羊

不到番禺久繁雄良自如江山禹貢外城郭漢兵餘圓  
折明珠浦旁行異域書五羊雖作樂雙鯉未宜踈

春田謫居書事

四十緇成素清明綠勝紅形容千慮後門館一貧中白  
日時時別青燕處處同此生蜃舌裏啼鳥莫春風

遊廣州悟性寺寺有趙王臺蓋尉佗時所築有

井甘甚號達摩井云

崎嶇走上方浩蕩取秋光臺上經樛女江天入夜郎華  
夷憑檻遠興廢引杯長泉脉來何處中含定慧香

春歸

東風定何物所至輒蒼然卜市花間合孤城柳外禽  
聲犯寒食江色帶新年無計驅愁得還推到酒邊

江漲

秋來雨似澆雨罷水如潮市改依高岸津喧救斷橋雲

陰哭鳩婦池溢走魚苗天意良難測前時旱欲焦

醉眠

山靜似太古日長如小年餘花猶可醉好鳥不妨眠世  
味門常掩時光枕已便夢中頻得句拈筆又忘籤

舟中

去楚及梅落過夔逢麥秋既非就國者伴作賈胡留心  
力盤灘盡年光拋渡休移書故山友慎勿厭鋤耰

雪意

睡眠拭朦朧開門雪正濃客來迷舊徑虎過識新蹤浦  
遠渾無鶴林深只有松惜琴如不解酒興若為供

瀘人何邦直者為安溪把截將有功不賞反得  
罪來惠州貧甚吾呼與飲為作此詩

楚人季布以勇顯魯國朱家用俠聞馳馬彎弓臣好武  
吹毛洗垢吏深文王孫此日誰漂母卿子前時號冠軍  
滿引一杯齊物論白衣蒼狗聽浮雲

舍弟既到有作

武陵倉卒記他時我獨南翔子北飛  
覩過幾多歸後事相看仍是別時衣  
匪躬老矣惟心在便腹依然但髮稀  
尚有苦吟三十載與君同飽蜀山薇

夜聞蛩戶叩船作長江礪欣然樂之殊覺有起  
余之興因念涪上所作招漁父詞者非是更  
作此詩反之示舍弟端孺

當年無奈氣狂何醉檣涪翁棄短蓑  
晚落炎州磨歲月欲從諸蛩丐烟波  
與君共作長江礪况我能為南海歌

身世即今良可見不應老子尚婆娑

長沙竹筍聞於天下大者可十觔重食之甘甚而不冰脾昔渡湘欲作詩未暇也今復過之

酬以此篇

地入長沙莫歎卑竹萌徑尺舊相知九重纔復金門籍  
萬里先參玉版師契濶累年真負口徘徊彌月未妨脾  
渭川風味那能對中有離騷九辯詞

閒居



木許幽人曉夢長  
朝朝親注佛前香  
有詩為愛袁家渴  
無病緣抄陸氏方  
身離蜚中誰是我  
食除蛇外總隨鄉  
白沙翠竹門前路  
疑出西郊向草堂

聞鄭二對吏五羊

舊友年來畧散亡  
新收鄭子亦遑遑  
歲云暮矣無雙雁  
我所思兮在五羊  
獄吏事權先自貴  
書生蹤跡況能狂  
風流人物今餘幾  
可忍羣兒復謗傷

西溪

西溪霜後更沉涵  
溪上愁人雪半簪  
市散爭歸橋納納  
櫓搖不進水潭潭  
利傾小海魚鹽集  
味入陀村酒茗甘  
百里源流千里勢  
惠州城下有江南

憫雨

老楚能令畏壘豐  
此身翻累越人窮  
至今無奈曾孫稼  
幾度虛占少女風  
茲事會須星有好  
他時曾厭雨其濛  
山中賴有菜糧足  
不向諸侯托寓公

重陽後一日從無盡泛舟遊處士臺故詩人秦

龜從所居

皂河經雨少微沙船帖臺根日未斜三徑就荒悲白士  
一樽相屬對黃花已將遠眺收平楚更遣清言到永嘉  
要見仙翁頭似漆請看醉後落烏紗

既以前韻贈勉翁復懷庭玉因次韻

千金駿骨買虛名騏老通衢價未評  
逐去定知窮不死  
向來元以句為生  
東風又見鶯朋友  
北信難憑雁弟兄  
欲寄此懷惟有月  
天涯分與故人明

寓精道齋有感懷家山二首

論兵作賦兩忽忽人事光陰轉首空五夜夢飛山色裏  
一年秋在雨聲中揚州騎鶴非無意上蔡牽黃信此窮  
幸有林泉未歸去欲將清興問征鴻

悠悠功業老堪憐舊事誰憑可共論直欲酒中賒快樂  
尚能花裏覓寒溫詩書誤我成何事歲月侵人不見痕  
汾水年年秋雁到庾郎何處不銷魂

贈瀘倅丘明善二首

吳頭楚尾秀山川一分才華占得全和氣暖敷冬有日  
清風寒壓瘴無烟分麾共領南門鑰簪筆終歸北闕天  
寄語江陽夷落道安排春織待新篇

可曾為客到江陽塞上蕭條斷旅腸歌動竹枝終日楚  
笛吹梅蘂數聲羌仰天太息偷閒憤被髮驚呼不為狂  
校尉自能青白眼肯教牛尾一般黃

書新堂

疊茅重葺一堂新設榻聊安簿領身落枕不知鶯樹曉

汙書長苦燕泥春獄官何預青苗事野意新便白葛巾  
能向此間時得趣何須分外拜車塵

春日郊外

城中未省有春光城外榆槐已半黃山好更宜餘積雪  
水生看欲倒垂楊鶯邊日暖如人語草際風和作藥香  
疑此江頭有佳句為君尋取却茫茫

峽路

上馬復下馬羸軀不暫停鈴聲今古道柳色短長亭亂

石波翻雪洪崖岫破青羊歸泂絕壁鹿飲入寒汀雨岸  
渾遮月中天畧見星雲來通玉壘江去背滄溟春少花  
難折霜多葉易零愛山猶著物畏棧未忘形事業知安  
在艱危已備經宦遊方此始何日遂鴻冥

遊仙雲宮

出郭三竿日橫江一葦航雀飛田有麥蚕罷野無桑下  
馬危梯滑開門古殿香雨餘丹井溢苔入醺壇荒盡老  
星辰動碑殘歲月亡鐘聲落城市符祝走村鄉埜鳥啼

巴蜀山崖刻漢唐  
臨歸更回首惜此一襟涼

春日雜興

愛梅長恐著花遲  
日禱東風莫後期  
及得見梅還冷淡  
東風全在小桃枝

月團新碾破春醒  
賴有歸鴻寄好音  
人在天涯莫回省  
恐偷華髮上瑤簪



石倉歷代詩選卷一百五十六

欽定四庫全書

石倉歷代詩選卷一百五十七

明 曹學佺 編

宋詩三十四

徐積

垓下歌

垓下將軍夜枕戈半夜忽然聞楚歌詞酸調苦不可聽  
拔山力盡無如何將軍夜起帳中舞八千兒郎淚如雨

此時上馬復何言  
虞兮虞兮奈何汝

江南春

今年是處春風早  
江南地煖春逾好  
春風次第入江山  
先入梅花既芳草  
芳草春深更有情  
直共江山到洞庭  
落花流水武陵道  
湖中有山春更青  
斜陽西落一點明  
少年莫上岳陽城

寄李道源

春風本是詩家友  
典却琴書也沽酒  
呼童去問紫霄翁

近來枕上吟詩否不醉不吟將奈何過却今年春已多  
胷中壯氣吐不出看看又作送春歌

酬李道源彈琴之句

數尺焦桐常在手知子愛歌無愛酒今朝已是二月三  
梅花驛使曾來否古今多少無奈何古人慷慨良已多  
為報陶潛且飲酒無絃琴上不須歌

贈查宣教

晚來閒共秋風約惟有黃花莫吹却有人懷抱似陶潛

待向東籬共花酌

和魯山感春

君看紛紛能幾時一翻情態隨光馳  
歡日常少戚日多  
共君且趁春風歌莫學時人種花草  
不似山中松桂好

述懷寄呂師

試眺關西山壁立春雲突盡長空窄  
濃嵐滴去渭川寒  
孤峰深入秦天碧白雲流水豈無情  
立馬吟詩定相憶  
且倩東風先寄聲我整西裝期已迫  
吟到秋風放客歸

歸時待作瀟湘客

送王潛聖

公車待報凡幾年  
蕭生罷去心浩然  
鹽漬野中尋舊隱  
楊子江頭呼渡船  
太湖波浪濕秋天  
洞庭橘柚生紅煙  
馬踏新霜吳嶺外  
猿啼小雪建溪邊  
關西夫子雖遲暮  
行笑行吟正安步  
菑川海上牧羊兒  
解說公孫放豚去

送李昂長官

征南兵勢欲平蠻  
軍聲殺氣秋風寒  
南國此時霜霰早

八月草黃楓葉丹江有渚兮山有麓君向洞庭何處宿  
四垂天幕亂波平九嶷山送愁嵐綠日斜葉落黃陵祠  
月明風起清湘竹愁娥遠放峽雲來冤臣暮借江聲哭  
雁號孤喙度蒼梧猿叫哀腸抱霜木此行正合風騷情  
縣衙仍在衡山足

寄蔣大漕

大使莫憂淮上老無山可望梅花少梅花可種山奈何  
日中枕上山更多豈無閒僧坐林下亦有樵子持斧柯

起來恍惚從萬里便買玄猿栽薜蘿人間流水寓之意  
天外白雲來者歌

送陳長官赴衡陽

楚天搖落霜風早山色依依江渺渺洞庭水寒帆影孤  
雁聲正在衡陽道君不見屈原憔悴賈生天遺恨至今  
猶未了日晚江頭船住時行人莫望江邊草

答范君錫

醉中數問風流掾酒價太高何日賤君將使我典衣沽



詩人未有春衫絹山陽才吏倪大夫煩君為我特致書  
正月臘寒猶未去諸君吟坐待圍爐

楊柳枝

楊柳枝試向枝頭折楊柳舞罷青衫困垂手相如病思  
最多情沈約才清更酣酒君看好鳥鳴枝間日與春風  
問安否清明前後峭寒時好把香綿閒抖擻

漁者

縛竹編茅雜亂蓬四籬俱是野花叢莫道江湖山色好

籬落不禁秋後風秋後風從西北起身上蓑衣冷如水  
夫妻却在釣船中兒孫走入蘆花裏夫妻不會作活計  
辛苦賣魚沽酒費兒孫身上更貧窮白日無衣夜無被  
昨日前村沽酒處今朝忽見無人住聞道江南地更煖  
移舟急望江南去

釣者

有人口誦浮雲曲手把瀟湘一竿竹荻花洲上作茅庵  
坐看江頭浪如屋

寄蘇子由

午日移陰後行人罷燕時路從西郭去船值北風吹夢裏猶迴首心中欲附詩從來義如此兩意自相知

寄張景修

東南未回客行樂又經年吳市花朝酒松江月夜船窮閭無屋住廣殿有詩傳若論平生事無如任自然

和孫元規資政遊園

禁煙娛樂且須頻二月風光特地新料得壺中無俗客

更聞歌者盡陽春酒來花下斟瓊液茶向松間碾玉塵  
應笑謝安空寂寞東山終日為何人

其二

紅作簾帷翠作裯隨軒歌舞一時新未知醒者何如醉  
且向樽前莫負春煙重柳梢寒蘸水日高花徑暖生塵  
自從三月芳菲後誤入桃源又幾人

召汝弼

外府新讎校問君來不來春隨流水遠日被落花催煩

予神仙御盡余賢聖杯何時松徑下閒坐踏蒼苔

寄穎叔

南郭茶杯菊未香西簷老柳覺疎黃家無縣令雙鳬鳥  
夢有仙人五色羊梅信易傳來嶺北雁書難附過衡陽  
定知遠俗懷公義若說威名背負芒

和路朝奉新君

世俗紛紛事總虛詩翁今作逸人居勤穿東地緣栽竹  
喜占明窓為著書近市好賒春肆酒就淮仍買晚罾魚

忽撐小艇來西郭不問皆知訪仲車

君向瀟湘我向秦

我望秦關方整駕子浮湘水欲登舟  
馬嘶山塢誰家宿纜繫江楓何處留  
壠上耕隨殘月去日邊帆帶落霞收  
瀟陵古恨騷人意歌向樽前不易酬

柳絮

君看青絲藥開花便棄捐臨風競離別  
就地忽團圓孤客正心亂浮雲來馬前  
瀟橋逢杜甫老泪更潸然

長條徒自重狂絮去何之禁籞穿花樹春江撲酒旗因  
風無定意著物有閒時謝媪何為者深情在雪詩

敗荷

有客方笑歌誰人吟敗荷但言為秋惜不道礙船過折  
柄刺芒在亂絲根本多江頭浪如屋今夜奈風何

貧女扇

妾有一尺絹已為身上衣自織清溪蒲團團手中持朝  
尋麥壠去暮汲水泉歸傍人偷看妾不使見蛾眉

宿山館

下馬開門日已沈  
回旋村路乞樵燈  
隔雲吠去誰家犬  
踏月歸來何處僧  
潭上風生千嶂吼  
枕前泉落一牀冰  
呼兒笑問今宵事  
身在危峰第幾層

文仙

紫微詔誥都經手  
東壁圖書盡在家  
何日再遊羣玉府  
吟窓依舊鎖煙霞

富仙



碧霞樓上常先曉  
白玉宮中愛早寒  
亂玉甃成池浴鳳  
渾金削就棟棲鸞

吟仙

金編誦處無人見  
玉洞題時有鳳知  
昨夜忽然何處去  
月中吟就白雲詩

醉起仙

佩環聲動出金華  
鳳引鸞隨入絳霞  
行到瑤臺雲路窄  
側身趨避玉妃車

地仙

瑤臺紫府都歸夢  
碧洞紅塵總是家  
蓬島有時來問信  
桃源無處不開花

太平仙

誰知我是太平仙  
歌罷浮雲笑暮煙  
更倚玉樓吟樂府  
斷虹消盡月明天

水仙

龍馭曾遊絳水霞  
回來却坐赤鯨車  
夜深正解雙珠珮

莫點犀燈照我家

題東軒

我有東軒景喜君為此行一如曠野外四面好風生但見雲連樹不知山是城重來如有約秋水夕陽明

春雪

天上星榆一夜彫晨風吹落下層霄溪頭岸狹流應漲簾外春寒到不消數騎急投村野宿幾人間問酒家謠登高望徧東城路又領詩兵戰寂寥

秋雲

淡似秋河水濃于春塢煙隴頭寒塞雁峽外晚江天忽  
斷月華墮乍明虹影連西風休強住飛勢自翩翩

村家

堦前生蔓草門外是多岐老叟行無伴兒童飽自嬉  
鵝羣巢衆樹狐迹過疎籬不肯勤耕耨豐凶為有時

漁者

家住前村蘆葦中一生無事是漁翁眼看波浪如平地

身向江湖若斷蓬  
小艇醉眠寒夜雨  
短帆閒挂夕陽風  
營營市井應相笑  
不道錐刀盡是空


雪

君看飛雪競翩翩  
雲將爭驅正著鞭  
人望已酬殘臘後  
物華無值早梅天  
招沽北掾輸平日  
走馬西州憶少年  
漏屋旋消濡獎褐  
破窓穿過濕餘箋  
蹄涔易見真窪滿  
糞土難辭偽色鮮  
席戶冷灰人削迹  
朱門熱炙客摩肩  
紛紛萬事還如此  
寂寂幽懷盡舍旃  
流水明邊爭趁月

斷鴻深處獨藏仙  
誰家漁棹空聞笛  
何處樵村只見煙  
最好耕農相賀了  
牛衣醉卧夕陽田

蘇子瞻挽詞

起起公終矣  
斯文將奈何  
新書傳異域  
舊隱寄東坡  
直道謀身少  
孤忠為國多  
死生公論在  
高義出岷峨



石倉歷代詩選卷一百五十七

欽定四庫全書

集部

石倉歷代詩選卷一百五十八至  
六十

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣方大川

膳錄監生臣顧達



欽定四庫全書

石倉歷代詩選卷一百五十八

明 曹學佺 編

宋詩三十五

晁冲之

古樂府

大星何歷歷小星爛如石  
掖垣崔嵬橫紫微十二羽林  
森北極今夕何夕月西傾  
虎抱空關龍厭直崢嶸北斗

著地垂手去匏瓜不盈尺嚴陵醉卧光武傍浮楂正值  
天孫織王良挾策飛上天傳說空騎箕尾立君不見茂  
陵棄子欲登仙自將壯士終南邊忽然遭窘出璽綬歸  
來下詔除民田阿瞞急示乘輿物鮮卑仍棄珊瑚鞭又  
不見古來垂堂戒華屋敵國挾輶戎接轂白龍魚服誤  
網羅孔雀金花被牛觸

夷門行贈秦夷仲

君不見夷門客有侯嬴風殺人白晝紅塵中京兆知名

不敢捕倚天長劍著崆峒同時結交三數公聯翩走馬  
幾馬驄仰天一笑萬事空入門賓客不復通起家簪笏  
明光宮嗚呼男兒名重泰山身如葉手犯龍鱗心莫懼  
當壚犢鼻馬相如慷慨直辭猶諫獵

送一上人還滁州瑯琊山

上人法一朝過我問我作詩三昧門我聞大士入詞海  
不起宴坐澄心源禪波洞澈百淵底法水蕩滌諸塵根  
迅流速度超鬼國到岸捨筏登崑崙無邊草木悉妙藥

一切禽鳥皆能言化身八萬四千臂神通轉物如乾坤  
山河大地悉自說是身口意初不喧世間何事無妙理  
悟處不獨非風幡羣鷺轉頸感王子佳人舞劍驚公孫  
風飄素練有飛勢雨注破屋空留痕惜哉數子枉玄解  
但令筆畫空騰騫君看瑯琊釀泉上醉翁妙語今猶存  
向來溪壑不改色青嶂尚屬僧家園

贈僧法一墨

黃山之巔百尺松虬枝偃蓋連羣峰山神守護魑魅避

道人剪伐天為容，捫崖蹠蹠篝火遠。  
絕壁晦靄凝煙濃，玄霜霏霏玉杵下。  
捕麋煮角當嚴冬，陰房風日不可到。  
律琯吹盡灰無蹤，小書細字著名姓。  
黃金照耀圖雙龍，守臣再拜選進日。  
九關有詔開重重，老儒偶得寔天幸。  
千金更買無由逢，上人澹泊何所好。  
工書草隸如飛蓬，苦來求我惜不得。  
一酬十載相過從，君不見玉堂詞人  
紫垣客，拜賜舞蹈黃羅封。長安紙價猶未貴，江南江北  
山皆童。

法一以前墨為未佳復以承宴墨贈之

我聞江南墨官有諸奚老超尚不如廷珪後來承晏復  
秀出喧然父子名相齊百年相傳文斷碎彷彿尚見蛟  
龍背電光屬天星斗昏雨痕倒海風雲晦却憶當年清  
暑殿黃門侍立才人見銀鈎灑落桃花箋牙牀磨試紅  
絲研同時書畫三萬軸大徐小篆徐熙竹御題四絕海  
內傳祕府毫芒惜如玉君不見建隆天子開國初曹公  
受詔行掃除王侯舊物人今得更寫西天貝葉書

東陽山人僻居

我家京洛間，桂玉資薄產。平生丘壑心，水竹不滿眼。清  
晨有客吳中來，山川指授收奇才。笑談長揖波浪下，懷  
抱遠承巖穴開。東陽山人高華隱，豪俠持身復修謹。旁  
山多闢黍稷田，碧溪東流汲春醞。溪南一畝當翠微，秋  
風萼熟菰葉肥。龜魚上帶藻荇動，鷗鷺下拂芙蓉飛。亭  
陰野塘亦新築，溪山共作窓中綠。諸郎年少皆知書，子  
夜哦詩動修竹。歲時冠蓋如浮雲，擊鐘鼎食江淮聞。愛

山自比謝康樂好士不減春申君我欲沿溪揚小楫亭  
邊共醉藤蘿月叩門夜訪君家時扁舟重載山陰雪

田中行

落葉如流人遷徙不可收嚴霜枯百草清此山下溝我  
行將涉之脫屣笑復休天風吹我裳彼亦難久留晚過  
柳下門鳥聲上嘲啾父老四五輩向人何所求邀我酌  
白酒酒酣語和柔指云此屋南頗有良田疇勸我耕其  
中庶結同社遊吾母性慈儉此事誠易謀伯也久吏隱



可以吾無憂請歸召家室賣衣買肥牛所望上帝喜祈  
穀常有秋

覽古

遙岑不娛人蒼莽頗愁絕東南有斷梁水寒不可涉西  
閨不欲往旦暮畏喋褻歸來坐北堂悠然理書策之人  
阿堵中雖死情不隔周公徂東山仲尼陳蔡厄大儒且  
不遇小子何足責時命姑置之胡為常促迫

紀愁

北風吹我裳夏潦漂我屋牛羊踐我稼雀鼠耗我穀雪  
寒墮我指雨淫疾我腹朝行桑榆間秋序傷遠目莫涉  
水之涯含沙中兩足攬轡馬病黃伏軾輿脫輶陟山既  
見虎還舍乃對鵬一沐三握髮十飯九不肉先生昔離  
垢居士今耐辱飽聞戒畏塗那知有沈陸

戲李相如攜婦還金鄉

舍人固多奇奉壁登章臺君王擊缶罷將軍負荆來長  
卿束髮時亦復悅名字一從臨邛遊心迹了不似茂陵

未得志要是才足依高堂援哀琴月出載婦歸文君入  
成都乃復愧四壁晚見負弩來良悔抱頸泣

傷心

時籍潞  
公宅

沙路朱轡想馭軒傷心歲月似星奔平泉有墅空流水  
綠野無人但繞垣九老畫圖傳盛事四朝書史載殊恩  
如何圩者持鋤過已向比隣問子孫

送惠純上人遊閩

早聽閩人說土風此身常欲到閩中春溝水動茶花白

夏谷雲生荔子紅樹接楚天山不斷波連粵嶺海相通  
北窓夜展圖經看手自題書寄遠公

睡起

素屏紋簾徹輕紗睡起冰盤自削瓜雨笋微微開綠籜  
風槐細細落黃花經營薄產初無意補葺疎籬漸有涯  
待得高秋尋靖老臨流坐石問丹砂

次二十一兄季此韻

憶在長安最少年酒酣隨處一欣然獵回漢苑秋高夜

飲罷秦臺雪作天不擬伊優陪殿下相隨于蔦過樓前  
如今白髮山城裏宴坐觀空習斷緣

次韻再答少蘊知府甥和四兄以道長句并見  
寄

錦袍昔是詩成得別墅今非碁賭來山蔚藍光交抱舍  
水桃花色合圍臺通人竹塢深深閑謝客松扉遠遠閑  
定與西湖爭勝負只應惟欠使君杯

都下追感往昔因成此詩

少年使酒走京華縱步曾遊小小家看舞霓裳羽衣曲  
聽歌玉樹後庭花門侵楊柳垂珠箔窓對櫻桃卷碧紗  
坐客半驚隨逝水主人星散落天涯

其二

春風踏月過章華青鳥雙邀阿母家繫馬欲低當戶柳  
迎人先出隔牆花鬢深釵暖雲侵閣臂薄衫寒玉映紗  
休作一生惆悵事隣州不寄海西涯

送王敦素

龍蟠山色引衡廬  
霜落江清影碧虛  
鼓枻厭騎沙苑馬  
行厨快食武昌魚  
緩歌玉樹翻新曲  
趣入金鑾續舊書  
官達故人稀會面  
君來相見肯如初

別昭德弟愴然傷懷

吾廬別汝到何期  
四十年間此別離  
合抱樹元從舊種  
成叢菊始自新移  
老無兄弟飄零日  
遠有公卿曠絕時  
努力不辭勤負米  
欲求三徑可從誰

僧舍小山

此老絕瀟灑久參曹洞禪  
胸中有丘壑手裏斲山川  
樹小風聲細巖深日影圓  
江湖不歸客相對一茫然

其二

聚沙真足戲知自法王孫  
一運郢斤手都無禹鑿痕  
藤梢未挂壁荷葉欲生盆  
笑問山陰道潛通何處村

其三

爛石有佳色禪房疊更幽  
九疑峰不斷十字水長流  
枕簟日逃暑軒窓時卧遊  
吾衰更何往只此對湯休



再至都城

崢嶸花萼西清曉望猶迷御路紅塵合宮槐碧瓦齊夾  
城知輦過複道覺香低中使傳宣入千門避馬蹄

至日

短晷催長至新晴改故陰風霜遊子鬢節序異鄉心合  
坐呼盧轉分曹舉白深百年家魏闕存沒一沾襟

秋雨感事

苦雨荒秋宅寒生木葉悲半垂藤護壁中缺蔓穿籬書

校時開帙壺提日繫絲儒冠吾已悞何責五男兒

次季此兄九日韻

清秋九日至晚菊兩三開愁把他鄉酒思登故國臺賜  
懷朝士寵詩想從臣才向晚能無淚飄飄雁影來

夏室

夏室不禦暑竹陰新未交幽花時結子晚燕續開巢午  
夢還高枕晨炊出近庖此生吾自了客至莫相嘲

夜坐

入夜暑氣薄輝輝星滿空鈎簾倚新月却扇受微風消  
渴幾時愈浮楂何處通輕生一快意波浪五湖中

梅

素月清溪上臨風不自勝影寒垂積雪枝薄帶春冰香  
近行猶遠人來折未曾江山正蕭瑟玉色照松藤

行泌水上

肅肅郊原靜牛羊草樹間石磯寒不掃水閣靜常關故  
里無消息孤城絕往還多愁獨來此猶得見河山

道中

北風吹雨不能晴  
羸病人騎瘦馬行  
鬢髮向來渾白盡  
半緣憂患半多情

夜行

老去功名意轉疎  
獨騎瘦馬取長途  
孤村到曉猶燈火  
知有人家夜讀書

石倉歷代詩選卷一百五十八

欽定四庫全書

石倉歷代詩選卷一百五十九

明 曹學佺 編

宋詩三十六

鄒浩

寄樓謙中

三年客揚州  
鄙吝誰與晤  
美人海上來  
青眼獨余顧  
荒涼弔遺蹤  
每每叅杖屨  
敗意無俗物  
欣快平生遇  
陶丘

今杜門習懶殆成痼塵尾挂壁間琴書自朝暮匡山正  
倚天枕漱實幽趣清壯增筆力重規謫仙句相望越千  
里款段不獲驅何當繼疇昔把手論情素惟有月下桐  
秋聲已如故

効十二屬體

區區鼯鼠技不優鼓刀要使無金牛力探虎穴必有獲  
縱如兔窟焉能謀好龍既久乃龍至畫蛇添足豈蛇侔  
驄馬御史風烈在瘦羊博士聲名流棘端猶作刻猴用

寶鼎忽患烹雞求相狗他年會見賞牧豕海上非吾憂

陶丘

得傍字

山河融結皆奇狀此丘之形誰與瓶一成為敦再為陶  
二帝昌時已詢訪至今禹貢名字存氣勢仍容蒔澤傍  
普天率土此其中雜還舟車來四向分茅開國南面尊  
屢致千金謝齊相爾來日月幾春冬興廢相尋人物上  
紛紛萬事已塵埃此丘迤邐初無恙平生苦死嗜登臨  
准擬攜筇事疎放冷雲寒日滿荆榛叢爾令人重悽愴

會須東走泰山巔縱目乾坤更何障

次韻羅正之提刑見寄

天邊故人贈明月恍惚如臨滄海闊幾年塵尾阻清談  
一日中腸寬百結鍾君骨朽誰能琴流水高山猶到今  
平生宮徵愧伯牙邂逅夫子還知心相期端欲追前古  
諸事斯言逃責數青雲窮達豈須論廊廟由來齊子午  
王景亮攜晁無咎清美堂記來求詩為賦此一

篇



先生不出二十年幅巾種樹老盧泉  
盧泉水木清且妍  
築堂流水茂樹間  
晁侯作記筆如椽  
畫欄素壁青瑤鐫  
明珠白璧光射天  
先生矜詫喜欲顛  
春歸野岸綠漪漣  
青山東缺如斷環  
雪消風軟山蒼然  
杏梢紅破臘脂寒  
先生醉狂夢思山  
自駕草車束塵編  
上堂讀書門晝關  
金徽朱絲弄猗蘭  
相思古人太古前  
若非豪士魯仲連  
即是幽人梁伯鸞  
先生好學老益堅  
少時不信功名艱  
青衫屢補靴決穿  
晚知有命絕可憐  
歸來自買汶上田

穠穠香露凝秋殷只知留客有酒錢肯問釜粥寒醞酸  
拖金曳繡卷曉班何似布褐煖且寬先生所願一何廉  
貴人孰與先生賢朱門銅臭厨肉羶夜闌白月照管絃  
美人一笑天桃然安知賢達死丘園正恐後世終無傳  
此意已輸先生先我今欲歸無由緣蕙帳依約聞清猿  
何時相從一醉眠梨花楊柳傍禁煙曾點浴沂春衣單  
德公渡沔應已還山中桂枝聊攀援

三朥亭

結構安在哉荒涼但郊藪無言對斜陽青天漫搔首惟  
餘舊時春年年暗榆柳棄置勿復論興衰古來有

成陽

茅茨土階不圖好想見遊宮滋草草有時警蹕從天來  
許語應無路傍老可封之民紛萬邦豈獨茲城知所保  
穀林南畔今何如煙草茫茫車馬道

韓園

春風挽我出邂逅陪友生濱湖足勝事繫馬聊班荆疎

柳傲清淺孤芳媚清明禽哢雜魚躍日轉無人行此間  
已深趣繼踵仍高情犀局自勝負玉軫誰虧成盈樽不  
在飲會意時一傾豈減七賢遊亦云四者并如何渺茫  
外忽起絲竹聲未暇從爾為目斷陘山橫

次韻仲弓見懷

與子風雨散掩關非世喧琴書到古人危坐屢忘言何  
當同此趣脫畧文物繁歲晏猶清居厲節真王尊

次韻崔光先見簡作詩催春色

春遊有客忘朝暮  
酷似經星好風雨  
豈知仲蔚長蓬蒿  
寂寂儒宮栽一畝  
新詩故委黃耳來  
舌在驚疑為頻吐  
鴻鈞密運掃轍蹤  
萬物終然歸鼓舞  
去年枯槁欲樵蘇  
今已蕃鮮媚農圃  
我家吹律信參天  
苗裔非才閒無覩  
族寒官冷自離奇  
安能仰贊媯皇補  
廟堂燮理皆少年  
佇見囊金罄花塢

次韻德符過曾園

東方澹殘星車馬各有之心  
落聲利間搖搖無靜時幽

人獨朝徹蟾光濯漣漪賦詩鷗鷺邊妙絕中郎詞青眸  
正相嚮白駒忽已馳歸來過我談聞風徒振衣

戲世美

楊家絕藝十六絃公卿往往趨賓筵妙齡才子更豪酌  
月中醉倒西湖船楚宮殘夢幾春曉五陵好事猶喧傳  
只今展江嘗託足香風帶恨留苔錢誰令故人不他寓  
竭來亭上仍秋天幽花脉脉鑑清湫似與當塗爭蚩妍  
此心如水平滌漾那堪鐸撥還鏘然驛驢夜半解歸鐙

青燈炯炯空韋編  
砧聲漁唱起何許  
坐久波面生寒煙  
故應鷗鷺有深意  
忽焉鼓翅鳴窓前

次韻德符訪世美

秋晨飯香積舉袂清風生  
揭來展江道老木森亭亭  
纖埃不隨步昨宵寒露零  
人境兩相值簡編煥新晴  
遷固久黃壤椽筆窺羣英  
崔子獨異趣一笑鉛槧輕  
詩成似金鑰為我開塵局

次韻韓君表雪中感懷

龍衣不解顏憂民向來急天高委真符年豐兆原隰連  
山水氣昏過雲雁聲澁先春凌馬奔投隙作塵入瀕竹  
乍蕭蕭驚風還汲汲頗輕花鬪狂肯共雨爭濕夜半回  
曉光木杪森鵲立開編適吾心鼓枻輟清集一飽儻可  
償萬事非所及想見秋稼前腰鎌荷青笠

次韻和韓大資湖光亭對雪之什

巖廊未旋歸故國聊自晦塵表澹崧高胷中妙天對豐  
年隨政還嘉雪徧境內從容陟九層指顧紛百態經綸



動初心枯槁入長嘅雖陳北海樽終念東臯耒只應沙  
路乾依前符帝賚

次韻世美見寄

鼻端漫故蠅心與天地遠判合亦何常從古車輪轉君  
不見儒衣攘攘趨白頭幾人管鮑情相投我豈季子難  
之鄒行矣同聽黃栗留

再宿南堂分韻得星字

夕雲不成雨冉冉東南征涼月挂河漢鮮風起階庭蛩

韻響新織螢光駛流星誰知亦有念夙駕在青冥

詠路

赤路如龍蛇不知幾千丈出沒山水間一下復一上伊  
余獨何為與之同俯仰

榴花

閣東閣西安石榴兩株相映花枝稠山高江闊萬木葉  
獨此爛熳開不休有如牙門集纓紱碧油幢外紅光浮  
又如青天駐羲御火龍鱗鬣驚人眸朝朝暮暮看愈好

直若有意寬離憂無窮歸念姑且置欄邊取醉商聲謳

### 仙宮嶺

曉雲生嶺端遮日成清陰炎氛遽辟易興逸安能禁仙  
宮風塵表高高百千尋石路上曲折健足猶難任綽約  
兩仙子雙鬟坐沈吟巫覡意何許門窓藤蔓深樵叟向  
我言自古傳至今去州五十里有峒鬱森森陶家李家  
女年各勝巾衿恍惚若逢遇相與登崎嶇一朝作蟬蛻  
英魂不墜沈鄉人共祠之髣髴來顧歆水旱禱輒應民

吏同所欽言已叟仙去四望祛煩襟回環萬峯巒插雲  
皆玉簪滔滔兩川流會合通梧潯虛徐韻長松飛鳴集  
珍禽我罪貸五鼎我軀重千金雖居瘴癘鄉肯使瘴癘  
侵囊衣完舊裾匣劍存初鐔中和王度新招詠惜惜  
賜環諒匪朝聊以寫我心

有感

雲回雨歇天欲晴鵲鳩喚婦皆和聲山南山北樹陰裏  
歡然相趁爭飛鳴伊余流竄止平樂妻孥尚寄瀟湘城

五嶺橫空喚不聞不如鴉鳩猶有情

九日對菊

不雨江亦乾草木翳塵土重陽到眼前菊蕊猶未吐鄰  
家一株來高才尺四五種之小庭中亦自足風矩摘葉  
以當茱萸可為伍泛我流霞杯喜色動眉宇頽然逍  
遙遊妙處有誰覩淵明何人斯東籬傲今古

少隱惠所畫瀟湘雪景

永州城北十五里二水初同為一水天花開玉滿前飛

人在故人亭子裏

其二

將謂雪消無覓處  
元來只在毫端住  
為余展出凍雲天  
一片滿湘宛如故

次韻錢岳雪中

六出飛瓊玖雲愁  
正臘天寒聲生密竹  
爽氣徹純綿故苑  
風初靜重樓月向圓  
何當酬此景  
蘸甲引金船

次韻王賢良贈陽先生

修塗幾閱歲終窮鶴唳猿啼蕙帳空杖屨何當歸舊隱  
靜看五柳颺春風

戲孫揚休

耿耿僧房寄日邊晚移窮巷避諠闐羹藜不飽同攻苦  
秣馬言歸獨處先木葉已隨風力遠霜輪行作璧形圓  
衣冠返敝文昌路何似高堂坦腹眠

石適中

南明山下讀書堂曾許寒生借燭光高義豈殊親骨肉

令人無復念家鄉那知十載天涯別忽起三泉薤露傷  
追恨故時攜手處焉能執紼助棺傍

發山口堤上

煙籠官柳柳籠堤風引澄波細細移駿馬不知鞍上意  
回頭已是獲麟陂

戲王寬之

晚來聞說醉黃封絃管欣欣急雨中應笑西鄰少風味  
一爐沈水對梧桐



湖上雜詠

何處清風作晚涼  
解衣相與面滄浪  
青萍紫芡令人恨  
遮却瑠璃萬頃光

濱湖一一敞雕欄  
自是黃塵不汝閒  
今日舒眉寧易得  
未應輕作剡溪還

聽泉

天中懸日月  
激激正鳴泉  
洗耳豈吾事  
披襟聊石邊  
焦桐無雜弄  
佩玉有羣仙  
欲識偃溪語  
于今蹄與筌

順陽東山下小池

行盡江山知幾重  
山前池沼尚殘紅  
塵埃滿眼欣相見  
駐馬垂楊夾岸風

送薛唐卿赴省試

河東文物久塵埃  
之子亭亭鬱有材  
已見中天鳴鸞鷟  
不應環堵更蒿萊  
綠衣春色知誰共  
青簡風流自此開  
傾耳西州人快意  
玉階曾上直言來

次韻酬德符湖上春色

乘風曾到水精宮  
春色推輪目力中  
幾處梅花傲殘雪  
不隨桃李事輕紅

與仲孺述之世美東禪納涼校韓文世美以韓  
公召先去

清風多處是精廬  
飯罷俱來校異書  
車馬能落吾事  
未斜桐影且安居

洗竹

欣欣花草不關心  
絕倒宮庭一畝陰  
夏籜隕風裁幾日

秋筠要月擬千尋攜持斤斧從他怪繚繞闌干著意深  
全是吳中舊瀟灑過門應喜伴龍吟

南堂

倦來揅策立階除深喜官中似隱居寒日西流報衙鼓  
紛紛清影上圖書

湖上訪世美不遇

夜雨朝晴似蜀天湖光山色故人邊琵琶不許陪犀塵  
聽水亭東一點然

次韻陳君益見寄

冉冉歲云暮，泠然流水心。他邦勤短策，今日慰孤斟。  
竹韻凌風遠，花光受月侵。毫端落珠琲，三復故情深。

次韻羅正之朝散到臨穎見寄

何事委天數，平生嗤李尋。同時得君子，如古惜分陰。  
白髮日非故，黃花秋似深。誰知千里駕，中有歲寒心。

代書招德符

北風鳴四野，飢鳥下黃昏。寒燭照無寐，孤懷誰與論。  
伊

余賦招隱撫事倍銷魂莫使衡門下朝來獨負暄

曾氏北園

蘇郎北闕未尋盟崔子西山尚掩扃  
矯首空庭問懷抱天高無路雁邊青

鄰家集射

牆東金鼓不停喧知是將軍奕世孫  
莫浪鳴弓向飛雁年年一度到中原

次韻君表送仲弓迴有作

北野陰成幄，崇朝得暫休。  
班荆無濁酒，交轡有清流。  
風絮間相逐，晴絲懶自遊。  
吾行亦朝夕，未擬問功裘。

春陰

極目三封日，易斜無因重。  
守故庭花春，陰又是憐芳草。  
燕子飛來知幾家。

初夏過西苑呈商居平程良弼二年兄

紅香吹盡綠陰垂，恰似當年錫宴時。  
今日玉津樓下過，午聲依舊轉黃鸝。

仁老寄墨梅

前年謫向新州去  
嶺上寒梅正作花  
今日霜鱗玩標格  
宛然風外數枝斜

池上

荷花荷葉滿池塘  
柄柄搖風作晚涼  
忽憶新開湖裏過  
遶船終日送清香

石倉歷代詩選卷一百五十九